

आकाशवाणी

खबरां

1. प्रधानमंत्री नरेंद्र मोदी होर अज्ज नमी दिल्ली च 11 ज्हार करोड़ रपे दी लागत दिएं द'ऊं जरनैली शिड़क परियोजनाएं दा उद्घाटन करडन।
2. बीजेपी पारलियामानी बोर्ड दी अज्ज दिल्ली पार्टी मुख्यालय च बैठक लगोग।
3. अंतरराष्ट्रीय अंतरिक्ष केंद्र च जाने आहले पैहले भारती अंतरिक्ष यात्री शुभांशु शुक्ला हुंदा दिल्ली पुज्जने पर निग्गा सुआगत कीता गेआ।
4. चुनांऽ आयोग नै मतदाता सूचियां तैयार करने च पूरी चाल्ली पारदर्शिता यकीनी बनाने ते सुधारें-तब्दीलिएं लेई दावे ऐतराज समें सिर जमा कराने पर जोर दिता ऐ।
5. 2025-26 आहले माली ब'रे दी पैहली तिमाही दरान भारत दे इलैक्ट्रानिक्स निर्यात च 47 प्रतिशत दा बाद्दा दर्ज कीता गेआ ऐ।
6. भारत दी तानिया हेमंत नै सैपन इंटरनेशनल 2025 च महिला सिंगल्स दा खताब जित्ती लैता।
7. बेगा ओपन स्कवाश दे फाइनल च अज्ज भारत दी अनाहत सिंह दा मुकाबला मिस्त्र दी हबीबा हानी कन्नै होग।

<><><><><><>

PM-Delhi Projects

प्रधानमंत्री नरेंद्र मोदी होर अज्ज नमी दिल्ली च कोई 11 ज्हार करोड़ रपे दिएं 2 मुख्ब राश्ट्री जरनैली शिड़क परियोजनाएं दा उद्घाटन करंगन। इन्दे च द्वारका एक्सप्रेस-वे दा दिल्ली ब्लॉक ते शैहरी विस्तार मार्ग दा दुआ हिस्सा शामिल ऐ। उद्घाटन मौके मोदी हुंदा इक किट्टु गी संबोधित करने दा बी कार्यक्रम ऐ। एह परियोजनां राजधानी दिल्ली च गड्डिएं दा रश घट्टु करने लेई तैयार कीतियां गेइयां न। इन्दे नै दिल्ली च आओजाई सखल्ली होग ते सफर करने च समें दी बी बचत होग। द्वारका एक्सप्रेस-वे दे 10 किलोमीटर कोला लम्मे हिस्से गी 5 ज्हार 300 करोड़ रपे दी लागत नै तैयार कीता गेआ ऐ जिसलै जे शैहरी विस्तार मार्ग दो निर्माण पर 5 ज्हार 580 करोड़ रपे दी लागत आई ऐ।

<><><><><><>

BJP-Meeting

भारती जनता पार्टी संसदीय बोर्ड दी अज्ज नमी दिल्ली पार्टी मुख्यालय च बैठक लगोग। बैठक दरान उपराष्ट्रपति चुनांऽ दे मेदवार पर चर्चा होई सकदी ऐ। सत्ताधारी राश्ट्री जनतांत्रिक गठबंधन दे लीडरें सब्भनं दी सहमति कन्नै इक्क प्रस्ताव पारित करियै प्रधानमंत्री नरेंद्र मोदी ते भाजपा अध्यक्ष जे.पी नड्डा होरें गी उपराष्ट्रपति चुनने लेई अधिकृत कीता ऐ।

<><><><><><>

Shukla-Welcome

भारतीय अंतरिक्ष यात्री ग्रुप कैप्टन शुभांशु शुक्ला अज्ज बहुलै मूंह न्हरे नमी दिल्ली पुज्जे। केंद्री मंत्री जितेंद्र सिंह, दिल्ली दियां मुखमंत्री रेखा गुप्ता ते भारती अंतरिक्ष अनुसंधान संगठन दे अध्यक्ष डॉ. वी. नारायण होरें ब्हाई अड्डे पर उंदा निग्गा सोआगत कीता। श्री शुक्ला 15 जुलाई गी अंतरराष्ट्री अंतरिक्ष केंद्र थमां परतोए हे। ओह अंतरराष्ट्री अंतरिक्ष केंद्र जाने आहले पैहले भारतीय ना। शुभांशु नै नासा दे एक्सओम-4 मिशन दी नुमायंदगी कीती ही। इसी 25 जून गी फ्लोरिडा दे कैनेडी स्पेस सेंटर थमां प्रक्षेपित कीता गेआ हा।

<><><><><><>

MEA-Nepal

विदेश सचिव विक्रम मिश्री अज्जै थमां दऊं दिनें दी नेपाल यात्रा लेई खाना होआ करदे ना। उंदा एह दौरा नेपाल दे विदेश सचिव अमृत बहादुर राय हुंदे सादे पर लगा करदा ऐ। भारत ते नेपाल बश्कार तगड़ी मित्री आहले सरबंघ ना। हाल दे किश बरें च दौनें देशें बश्कार बक्ख-बक्ख क्षेत्रें च सहयोग च बादा होआ ऐ।

<><><><><><>

EC

निर्वाचन आयोग नै आखेआ ऐ जे मतदाता सूचियां पूरी पारदर्शिता ते कनून कायदे दी पालमा करदे होई तैयार कीतियां जंदियां ना। आयोग नै गलाया जे मतदाता सूची तैयार करदे मौके हर चरण च सियासी दलें गी शामिल कीता गेआ हा। आयोग नै पिछले चुनावें दियां मतदाता सूचियें च कथित कमियें दा मुद्दा पुट्टे जाने दी निंदा कीती ऐ। आयोग नै गलाया ऐ जे मतदाता सूचियें कन्नै जुडे दा कोई बी मुद्दा या फी दावा या ऐतराज उस अवधि दरान कीते गेदा हुंदा ते उंदी जांच कीती जाई सकदी ऐ।

<><><><><><>

Goyal

चालू माली बरे दी पहली तिमाही दरान भारत दे इलेक्ट्रानिक्स निर्यात च पिछले माली बरे दे मकाबले 47 प्रतिशत दा बादा दर्ज कीता गेआ ऐ। बंज बपार मैहकमे दे मंत्री पीयूष गोयल होरें इक सोशल मीडिया पोस्ट च आखेआ जे मेक इन इंडिया दी कामयाबी करियै पिछले इक दाहके च इलेक्ट्रानिक्स उत्पादन 31 अरब डालर शा बढियै 133 अरब डालर होई गेआ ऐ। श्री गोयल होरें दस्सेआ जे इस क्षेत्र च रोजगार दे बी मते मौके पैदा होए ना।

<><><><><><>

Jaishankar-Korea

विदेश मंत्री डॉ. एस जयशंकर होरें कल दक्खन कोरिया दे विदेश मंत्री चौधरी हयून हुंदे कन्नै नमी दिल्ली च बैठक कीती। अपनी इक सोशल मीडिया पोस्ट च उनें दस्सेआ जे दौनें धडें बश्कार बपार-कारोबार, विनिर्माण, समुंद्री क्षेत्रें ते दौनें मुलखें दे लोकें बश्कार मेल मलापते आदान-प्रदान समेत बक्ख-बक्ख क्षेत्रें च सहयोग बढाने दे बारे च चर्चा होई। दौनें नेताएं सेमीकंडक्टर, आर्टिफिशल इंटेलीजेंस, स्वच्छ उर्जा, रक्षा, हिंद प्रशांत ते कुल संसारी सतह पर मजूदा हालात ते घटनाक्रमें बारै बी विचार-बटांदरा कीता। इस बरे दौनें मुलखें दी विशेष रणनीतिक सांझ भ्याली दी 10मीं बरेगंड बी ऐ। पहलगाम

आतंकी हमले दे बारे च उनें आखेआ जे दक्खन कोरिया कुसै बी चाल्ली दे आतंकी हमले दे भलेआं खलाफ ऐ।

<><><><><><>

Putin-Summit

रूस दे राष्ट्रपति व्लादिमीर पुतिन होरें अमरीका दे अलास्का च राष्ट्रपति ट्रंप हुंदे कन्नै होई दी अपनी मलाटी गी सेही समें पर होई दी इक कारी दी बैठक करार दित्ता ऐ। कल मास्को च मंत्रीमंडल दे मिम्बरें ते होरनें अधिकारिएं कन्नै गल्लबात दुरान पुतिन होरें दस्सेआ जे बैठक पूरी चाल्ली स्पष्ट ते साफगोई कन्नै होई दी चर्चा दे कारण रूस लेई फैसले तगर पुज्जना मुमकिन होई सकेया ऐ। पुतिन होरें आखेआ जे राष्ट्रपति ट्रंप हुंदे आंगर उब्बी यूक्रेन कन्नै लड़ाई दे तौले मुक्कने दी इच्छेआ रखदे ना। उनें गलाया जे ट्रंप होरें गी इस बारे जानकारी दित्ती गई ऐ जे यूक्रेन संकट दा हल किस चाल्ली होई सकदा ऐ। पुतिन होरें दपक्खी सहयोग बहाल करने दी अपील कीती ते ट्रंप होरें गी सादा बी दित्ता।

<><><><><><>

Trump-Zelenski

अमरीका दे राष्ट्रपति डोनाल्ड ट्रंप होरें आखेआ ऐ कि कि रूस कन्नै लड़ाई खत्म करने लेई यूक्रेन गी समझौता करना होग कीजे रूस इक बड़ी ताकत ऐ जिस्सलै जे यूक्रेन नेही। रूस दे राष्ट्रपति व्लादिमीर पुतिन हुंदे कन्नै अलास्का च लग्गी दी बैठक दे बाद ट्रम्प होरें आखेआ जे उंदा कम्म दौनें मुल्ले बश्कार समझौता कराना ऐ ते रूस यूक्रेन दौनें गी सिद्धे-सिद्धे शांति समझौता करना लोड़चदा कीजे संघर्ष विराम अकसर आरजी गै साबत होंदे ना।

<><><><><><>

Badminton

भारत दी तान्या हेमंत नै साइपन इंटरनेशनल बैडमिंटन प्रतियोगिता दा महिला सिंगल्स दा खताब जित्ती लैता ऐ। उत्तरी मारियाना द्वीप समूह च आयोजित इस प्रतियोगिता दे फाइनल च तान्या नै जपान दी कानाए सकाई, गी हराइयै खताब अपने नां कीता। तान्या दा इस बरे दा एह पैहला ते अपने करिअर दा चौथा अंतरराष्ट्री चैलेंज खताब ऐ एहदे शा पैहले तान्या नै 2022 च इंडिया इंटरनेशनल, 2023 च ईरान फज्र इंटरनेशनल ते पिछले बरे बेंडिगो इंटरनेशनल च जित्त हासल कीती ही।

<><><><><><>

Weather

मौसम विभाग नै अज्ज महाराष्ट्र कोंकण, गोवा ते तेलंगाना च बक्ख-बक्ख थाहरें पर बरखा दा रेड अलर्ट जारी कीता ऐ। कर्नाटक दे समुंद्री कंडे आहले ते दक्खनी हिस्से पच्छमी एम.पी ते गुजरात दे किश हिस्से च कल तेज बरखा बरने दी पेशगोई कीती गई ऐ। कर्नाटक, तेलंगाना, तमिलनाडू, केरल, माहे, तटीय आंध्र प्रदेश ते यानम च अगले 2 दिने दुरान बड़ी मती बरखा बरने दा अंदाजा लाया गेआ ऐ।

<><><><><><>